



АКАФИСТ СВЯТОЙ БЛАЖЕННОЙ ВАРВАРЕ, ЗАТВОРНИЦЕ СКВОРЧИХИНСКОЙ

Кондак 1

Избранной страны Уфимския новой дивной
угоднице ныне радостно приносим ти, о, мати,
хвалебная пения, ты же, яко имеяй дерзновение
ко Христу Богу, от всяких нас бед свободи, да
зовем ти: Радуйся, всехвальная Варваро,
затворница блаженная.

Икос 1

Ангели на небеси радовахуся, егда видеvше, яко
звезда утренняя возсияла еси над пределами
Уфимския земли, прогоняя тьму греховную
светозарным твоим житием, блаженная мати, и
приводя к свету Христову многия люди, темже
приими от нас хваления сицевая:
Радуйся, в небесней славе Ангелом
уподобившаяся;
Радуйся, в чине пророков, яко дар
прозорливости имущая, вписанная;

Радуйся, к лику апостолов, яко словом и делом
Христа влаговестившая, сопричтенная;
Радуйся, в сонме мучеников, яко Христа ради
притерпевшая, восприятая.
Радуйся, в собрании исповедников саном
исповедничества почтенная;
Радуйся, с девствующими, яко девственница
возвеличенная;
Радуйся, благ преподобных от века уготованных
наследия удостоенная;
Радуйся, со всеми святыми Богу угодившими
участие обретшая;
Радуйся, мудрая страннице Отечества горняго
искавшая;
Радуйся, нозе твои в путь спасительный для
многих направившая;
Радуйся, в подвизех и трудах твоих нескончаемо
наслаждающаяся;
Радуйся, Царствия Небесного общнице и
обладательнице являющаяся;
Радуйся, всехвальная Варваро, затворица
блаженная.

Кондак 2

Видяще нашими очесы величие духовныя
красоты и премудрости твоея, блаженная
Варваро, мы, яко земнии, удивлением, радостию

и благодарением ко Творцу всяческих
исполняемся, зовуще: Аллилуиа.

Икос 2

Разум подавая людем Господь, отверзе тебе ум,
благаго иерея Василия отрасли благая, прежде
косну и неудобну ко изучению книжныя
премудрости бывшу, да явится, яко не от
человек, но от Бога прияла еси разум, о немже,
обрадованная, прими от нас радостное пение
сие:

Радуйся, навикнувшая хранить страх Божий
премудрости начало;

Радуйся, всем учащимся у тебе бывшая
добродетелей зеркало;

Радуйся, на скрижали сердца своего закон
Божий написавшая;

Радуйся, учение сие всем слушающим тя
подающая;

Радуйся, висоокоумныя вражия учения
отметшая;

Радуйся, мудрых века сего разумом
превосходящая;

Радуйся, на подвиг юродства Христа ради
свыше призванная;

Радуйся, горькую жестокость вольного юродства
паче всех возлюбившая;

Радуйся, юродствовавшая пред человеки, да

ликовствуеши со Ангелы;
Радуйся, великим праведником, Андрею
Цареградскому, Верхотурскому Симеону и
прочим, Христа Ради юродивым подражавшая;
Радуйся, людстии поругания и осмеяния в честь
себе вменившая;
Радуйся, всем обидящим тебя вседушно
прегрешения простившая;
Радуйся, всехвальная Варваро, затворница
блаженная.

Кондак 3

Силою благодати Божией движима, потщалася
еси, богомудрая Варваро, весь малую, место
подвигов твоих, достигнути, идеже распалася
еси всем сердцем твоим в любовь Христову,
благодарственно вопиючи Ему: Аллилуиа.

Икос 3

Имея помысл чист, крепкою верою в Бога
вооружившася, пути спасительнаго держастася,
мати всехвальная, егоже и совершиста
преславно; сию помощь и нам, хотящим твоему
житию подражати, испроси у Престола
Всевышняго, да благодарно зовем ти:
Радуйся, в помрачении страстей пребывающих
просветительнице;
Радуйся, в суете и самозабвении

жительствоющих вразумительнице;
Радуйся, в недоумении и заблуждении сущих
руководительнице;
Радуйся, добре жити начинающих
управительнице;
Радуйся, малодушием и унынием колеблемых
укрепительнице;
Радуйся, в небрежении спящих
возбудительнице;
Радуйся, бодрости и трезвения предобрая
учительнице;
Радуйся, нерадения и праздности известная
прогонительнице.
Радуйся, трудолюбия, еже всякому благу
утверждение, рачительнице.
Радуйся, чистаго и непорочнаго жития
неусыпающая хранительнице;
Радуйся, всех ко спасению верная
путеводительнице;
Радуйся, всех, благочестно жити хотящих
мудрая наставнице;
Радуйся, всехвальная Варваро, затворица
блаженная.

Кондак 4

Бури житейских напастей бежавши, Блаженная,
паче брака честна, житие девственное
возлюбила еси и от земнаго жениха уклонилася

еси, да единому Небесному Жениху
поработаеши, поюще Ему: Аллилуиа.

Икос 4

Слышала еси, блаженная; яже апостол рече: не
посягшая печется о Господних, да есть свята, и
телом и духом, и сему поревновала еси темже тя
величаем:

Радуйся, яко позвавшему тя Святому Духу и
сама телом и духом свята, еси;

Радуйся, от скверны плоти и духа непорочну
себя соблюла еси;

Радуйся, великомученицы Варвары девству и
подвигу поревновала еси;

Радуйся, рожденному от Девы Жениху Христу
деву ты чисту вручила еси;

Радуйся, лилие произрастшая в земном
Христовом саде;

Радуйся, процветшая в небеснем Его
вертограде;

Радуйся, в лике девственных последовавшая
Божьему Агнцу на небеса;

Радуйся, непорочная агнице Христова венец
добродетелей в себе совокупившая;

Радуйся, ангельскую чистоту являющая;

Радуйся, целомудрию наставляющая;

Радуйся, непорочностию враги побеждающая;

Радуйся, за чистоту тела и души многих даров

сподобилася еси;
Радуйся, всехвальная Варваро, затворица
Блаженная.

Кондак 5

Боготечную звездою яви ты миру житие твое,
блаженная мати Варваро, яко паче всего
возлюбила еси Христа, и ради мук временных
уповая избавлена быти вечных мук, воспевала
еси благодарне Ему: Аллилуиа.

Икос 5

Видевше ты людие Уфимския земли, мати
Варваро, всеми добродетельми украшену и
равноангельное житие в стеснении тяжцем
провождавшую, прихождаху к тебе, ови
благословения, ови наставления, ови утешения
от тебе ищуще: ты же спасению человеческому
ревностно служила еси и ныне слышащи от всех
песни таковыя:

Радуйся, яко явилася еси в стране Уфимстей
крепкая защитнице противу хульников
Христовы Церкви;

Радуйся, яко и ныне борющимся с ними
усердная пособнице обретаешия;

Радуйся, противников святыни
посрамительнице;

Радуйся, злых волков от стада Христова

отгнательнице;
Радуйся, звездо на краю тьмы кромешныя;
Радуйся, в годину буйих дней дивно
процветшая;
Радуйся, от беззаконных слуг антихристовых
мученная;
Радуйся, радующая нас неборимостью Креста;
Радуйся, свете нечестивых мрак изводящая;
Радуйся, Христа ради гонениям удостоившаяся;
Радуйся, исповедничеством твоим люди
Уфимския земли в вере утвердившая;
Радуйся, любви жертвенней, вечней нас
научающая;
Радуйся, всехвальная Варваро, затворница
блаженная.

Кондак 6

Проповедницею быв житием твоим
евангельских добродетелей, мати блаженная,
плоть твою постом и молитвою поработила еси,
своими подвигами всезлобнаго врага посрамила
еси, и ко свету Христовой истины люди земли
Уфимския привела еси, поучая непрестанно
молитися за все благодарити и славословити
Господа, поя ему: Аллилуиа.

Икос 6

Возсияла еси на горах Уральских яко столп
утверждения верных, Варваро богомудрая и из
затвора мрачнаго востекла еси на гору
Небесную, отнюдуже озаряеши храмы
Уфимския земли, в нихже почитаешия по
достоянию среди сонма новомучеников и
исповедников, и слышащи от верных пение
сицевое:

Радуйся, к церковной службе усердно с детства
прилежавшая;

Радуйся, измывшая душу свою токами
слезными;

Радуйся, молитися за ны ко Господу
дерзновение обретшая;

Радуйся, дары Духа Святого в сердце твое
приемшая;

Радуйся, меч духовный подъявшая;

Радуйся, именем Иисусовым враги невидимыя
отражавшая;

Радуйся, молитвы усердная делательнице;
радуйся, языком молчаливая, умом хвалившая
Бога;

Радуйся, земли Уфимския ходатаице;

Радуйся, заступлением твоим вечныя смерти
уповаем избежать;

Радуйся, яко твоими молитвами расточенныя
стада церковныя собираются;

Радуйся, яко Всемогущему Господу со
Премчистою Девою Богородицею о всех людех
руце свои воздеваеши;
Радуйся, всехвальная Варваро, затворница
блаженная.

Кондак 7

Хотя Господь страну Уфимскую благодатию
Своею обогатити и дати образ хотящим
спастися, подвиже тя, о, мати, Духом Святым на
скорбное и богоугодное житие, ты же усердно в
теплоте сердца воспевала еси Ему песнь:
Аллилуиа.

Икос 7

Новую ты подвижницу дарова Господь,
блаженная мати, яко подвиги твоими и чудесы
всю землю Уфимскую облистала еси, мы же,
последовавше душеспасительным стезям твоим,
также зовем:

Радуйся, вместо избранья пищи постом себя
питавшая;

Радуйся, вместо сладкаго пития слезами саму
себя напоившая;

Радуйся, на мысленныя враги пост и молитву
вместо оружия употреблявшая;

Радуйся, сицевыми твоими подвигами Божию
славу в мире явившая;

Радуйся, жития безплотных возжелавшая;
Радуйся, в постничестве древним
пустынником поревновавшая;
радуйся, подвигами плоть свою духу
покорившая;
Радуйся, постников благодатное удобрение;
Радуйся, яко тело постом умертвила еси;
Радуйся, яко душу едиными молитвами оживила
еси;
Радуйся, яко пощения ради и немолчного
славословия Богу райских сладостей вкушаеши;
Радуйся, яко пресладким Пресвятыя Троицы
лицезрением выну насыщаеши;
Радуйся, всехвальная Варваро, затворница
блаженная.

Кондак 8

Странник кров узрев радуется и пришед покой
си приемлет, и ты, блаженная, радости
исполнилася еси в храме малой при сельцы
водворившись, отнюдуже Богови выну
возносила еси песнь: Аллилуиа.

Икос 8

Вся телом в тесном затворе была еси, духом
Престолу Царя Славы предстояй блаженная, нас
земнородных молитвою не оставила еси, тойже
вси отечества Небеснаго достигнути хотящих

тебе зовем:

Радуйся, пророка Божия Илии, в пещере
жившаго, благая подражательнице;

Радуйся, Крестителя Христова Иоанна, в
пустыне обитавшаго ревностная
последовательнице;

Радуйся, подвижническаго отшельническаго
жития усердная любительнице;

Радуйся, из мест темных светившая людям
равноангельным твоим житием;

Радуйся в скотьем хлеву, яко агница малая,
вселилася еси;

Радуйся, храмину темную и тесную светлым и
пространным палатам предпочла еси;

Радуйся, Христа ради труды, глад и мраз в
затворе подъяла еси;

Радуйся, тамо, яко в храме Триипостаснаго
Бога, душу свою освятила еси;

Радуйся, в затворе многолетно подвизавшаяся;

Радуйся, оттуда в жилища Небесная вшедшая;

Радуйся, в тесноте той главу глубиннаго змия
сокрушившая;

Радуйся, богомыслием непрестанным тамо
небесная блага созерцавшая;

Радуйся, всехвальная Варваро, затворница
блаженная.

Кондак 9

Всякое естество удивися, мати Варваро, сиянию
в тебе благодати Христовой и многому
состраданию к людем, в нихже твориши
преславная чудеса, во еже пети: Аллилуиа.

Икос 9

Витийствовати желая, убогий, како возмогу
воспети дивная чудеса твоя, блаженная мати,
аще не ты сама вразумиши мя, обаче побужден
усердием и благословением святительским
дерзаю венчати тя сими недостойными
сицевыми похвалы:

Радуйся, провидице дивная, будущая яко
настоящая узревшая;

Радуйся, яко люди земли Уфимския вещим
глаголом уст твоих внимают;

Радуйся, прегрешения сокровенная прозорливо
обличаеши;

Радуйся, яко скорбящих и не имущих надежды
утешаеши;

Радуйся, немощей наших целительнице
милосердная;

Радуйся, в бедах и обстояниях помощнице
скорая;

Радуйся, преисполненная всякия благостыни;

Радуйся, удостоенная Ангельскаго

собеседования;
Радуйся, в сусе месте источник водный тещи у
Бога испросившая;
Радуйся яко тяжде вода молитвою твоею
чудодействует;
Радуйся, свеще неугасимая, молитвою
пламенеющая;
Радуйся, в благодати Божией вся, аки во огни,
стоящая;
Радуйся, всехвальная Варваро, затворица
блаженная.

Кондак 10

Спасение залог, православную веру,
унаследовахом от тебе, блаженная Варваро,
темже молим тя: от всяких ересей и расколов
соблуди нас и помози нам в Православии
непоколебимом пребывати, и верно пети Богу:
Аллилуиа.

Икос 10

Стеною твердою будеши нам, всехвальная мати,
с теплою верою, усердием и любовью к тебе
прибегающим, ограждающе нас противу
чувственных и мысленных врагов наших, да не
убоимся их, но да побеждаем тии молитвами
твоими ко Христу Богу, зовуще со
благодарением сице:

Радуйся, все твое утешение и блаженство в
нищете положившая;
Радуйся, всецело саму себя на Промысл Божий
возложившая;
Радуйся, мира к всех его прелестей доблестная
презрительнице;
Радуйся, нестяжания теплейшая любительнице;
Радуйся, мягких и светлых одежд на ся никогда
же возложившая;
Радуйся, рубища, аки драгоценныя украшения,
во всем житии твоём выну носившая;
Радуйся, за Христом в житии твоём
последовавшая;
Радуйся, одежды и крова лишенным в недрах
милосердия Божия покров и убежище
открывающая;
Радуйся, умерщвлением диавольскую прелесть
низложившая;
Радуйся, яко за труды твоя от Христа Бога
Царство Небесное восприявшая;
Радуйся, алчущих и гладствующих милостивая
кормительнице;
Радуйся, убожествующих и в скорбной нищете
сущих всещедрая обогатительнице;
Радуйся, всехвальная Варваро, затворница
блаженная.

Кондак 11

Пение умиленное приносим ти недостойнии и вопием: ходатайствуй за нас присно к Богу, от страстей недугующих, и подаждь нам исцеление, и грехов избавление, да и мы в радости воспоем прославляющему тя Господу песнь: Аллилуиа.

Икос 11

Свет ти незаходимый возсия возненавидевшей страстей тьму, угоднице Божия, веселие же нескончаемое восприя ты, добрый подвиг со тщанием скончавшую. Темже, предстоя ныне Престолу Христову, поминай нас, поющих ти сице:

Радуйся, о кончине своей за две седмицы Богом извещенная;

Радуйся, таинственнаго Собеседника посещением удостоенная;

Радуйся, сей беседой обрадованная;

Радуйся, яко сия беседа от нас не утаится;

Радуйся, пред самую кончиною огненное искушение претерпевшая;

Радуйся, и тогда человеколюбие свое не оставившая;

Радуйся, в затворе земной путь свой прошедшая;

Радуйся, яко и ко Господу отошла в уединении;
Радуйся, десятью отроковицами на погребение
несома;
Радуйся, голубиеми до места упокоения
сопровождаемая;
Радуйся, яко ластовица легкокрылая вознеслася
еси от нас на Небо;
Радуйся, и перстью гроба твоего нас исцеляеши;
Радуйся, всехвальная Варваро, затворица
блаженная.

Кондак 12

Благодать велию даде тебе Господь недужных
болезни врачевати, демоны прогоняти и страсти
целити, тем же не забуди и нас, призывающих
тя и молитвами твоими от напастей избави, да
благодарно вопием к Богу: Аллилуиа.

Икос 12

Поюще твое житие, похваляем подвиги твои:
пост, молитвы, слезы, коленопреклонения,
всенощныя бдения, плоти умерщвление, духа
сокрушение, долугегания, смирение, кротость,
молчание, терпение, нищету нестяжание и вся
та чтим, яже любве ради Христовы подъяла еси,
такое воспевающе:

Радуйся, яко могильный затвор оставила еси;
Радуйся, яко обитель нашу пришествием твоим

благословила еси;
Радуйся, яко в ней ныне святыми мощами
твоими почиваеши;
Радуйся, яко подвижающимся иноком спасения
упование и ходатаице;
Радуйся, страны Уфимския крепкое
ограждение;
Радуйся, людем ея от искушений диавольских
хранение;
Радуйся, яко тобою имя Господне во всех
пределах земли нашея прославляется;
Радуйся, яко и твое имя от всех градов и весей
ея воспевається;
Радуйся, телеса наша прикосновением к раце
мощей твоих врачуеши;
Радуйся, души наши молитвами твоими к
райскому блаженству возводиши;
Радуйся, всем нам наставнице и мати;
Радуйся, источник благословений и милостей
Божиих чадом твоим;
Радуйся, всехвальная Варваро, затворица
блаженная.

Кондак 13

О, премудрая блаженная наша мати Варваро,
новая праведнице земли Уфимская, прими
ныне малое моление наше и принеси е ко
Христу, да сохранит нас от всякия скорби и

внезапныя смерти и вечного мучения избавит,
да с тобою воспеваем к Нему: Аллилуиа,
Аллилуиа, Аллилуиа.

Сей кондак глаголи трижды, по сем Икос 1-й и
Кондак 1-й.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**